

Kisah Perjuangan Sebuah Negara Islam

Firman Allah di dalam kitab suci al-Qur'an al-Karim: (*kam min fi'atin qalilatin ghalabat fi'atan kathiratan bi idhi Allāh*) ertinya: "Berapa banyak di antara puak yang sedikit bilangannya telah dapat mengalahkan puak yang banyak bilangannya dengan izin Allah."

Meskipun ayat ini diturunkan pada zaman Rasul Allah (S.A.W), bersempena dengan beberapa kemenangan yang telah dicapai oleh pihak kaum Muslimin yang sedikit bilangan bala tenteranya, dengan pihak musyrikin yang lebih banyak bilangannya; namun begitu kesan kebenaran yang terkandung di dalam ayat tersebut masih dapat dilihat dengan nyata di dalam beberapa segi perjuangan umat Islam melawan kaum kafirin pada abad yang ke-dua puluh ini.

Di bawah ini kita bentangkan sebuah kisah ajaib berhubung dengan pertolongan Allah yang tidak disangka-sangka terhadap perjuangan umat Islam Pakistan sewaktu mereka melawan serangan-serangan yang begitu kejam dan dahsyat dari bala tentera India yang lebih besar dan lebih lengkap alat senjata peperangannya dan lebih banyak bilangan bala tenteranya. Kisah ini hasil dari penyisatan dan tulisan wakil kita yang telah melawat ke negara-negara Timur Tengah dan Asia baru-baru ini.

"Manakah bekas-bekas runtuhannya rumah daripada bom-bom yang telah dijatuhkan oleh kapal terbang-kapal terbang India di dalam serangannya ke atas bandar Karachi sebagaimana yang kami dengar?" Inilah pertanyaan yang dikemukakan oleh penulis kisah ini apabila sahaja ia sampai di bandar Karachi.

"Allah telah menolong dan menyelamatkan kami dan Dia sentiasa bersama-sama dengan hamba-Nya orang-orang Islam", jawab teman penulis yang ditanya itu dengan muka yang berseri-seri sambil menadahkan kedua-dua belah tangannya ke langit mengucapkan kesyukuran kepada Allah Yang Maha Pengasih Lagi Penyayang. Kemudian ia pun berkata: "Kami bersyukur kepada Allah bahawa dengan kekuatan yang sebegini kecil kami dapat bertahan dan kemudian dapat mara masuk ke dalam tanah besar India, sesudahnya tentera-tentera India cuba merempuh dengan mengejut sambil menghebahkan kepada

dunia bahawa bandar Lahore sudah jatuh ditawan dan bandar Karachi hancur lebur dibom oleh kapal terbang-kapal terbang penyerang India." Maha Suci Allah Yang Maha Kuasa, di dalam menolong hamba-hambanya yang beriman dengan firman-Nya: (*kam min fi'atin qalilatin ghalabat fi'atan kathiratan bi idhi Allāh*) ertinya: " Berapa banyak di antara

puak yang sedikit bilangannya telah dapat mengalahkan puak yang banyak bilangannya dengan izin Allah."

Kejadian ini tentunya mengingatkan kembali para pembaca yang membaca sejarah kebangkitan umat Islam di zaman permulaan Islam – di dalam peperangan Badar dan Uhud – sekali pun zamannya telah berlalu dan beberapa banyak menerima perubahan, tidak ada manusia yang dapat berbuat barang sesuatu dengan sekehendak hatinya kalau tidak dengan izin Allah. Dan dengan peristiwa yang tersebut tentunya manusia yang beriman kepada Allah akan



Tentera Pakistan yang dihidupkan

keberaniannya oleh Allah

bertambah yakin kepada kekuasaannya yang tidak ada batasan dan tolok bandingnya itu: dan hati mereka tentunya akan

bertambah taqwa kepadanya.

Keadaan suasana sebelum bulan September tahun 1965 mengenai Kashmir bertambah tegang. Perundingan-perundingan mengenai Kashmir tidak dapat dicapai, kerana India bermati-matian tidak mahu menyerahkan perkara Kashmir kepada keputusan umat Kashmir sendiri dengan mengadakan pungutan suara, sama ada wilayah Kashmir yang menjadi rebutan kedua-dua belah pihak itu masuk kepada India atau Pakistan atau pun berkerajaan sendiri. India tetap menunjukkan keangkuhannya kerana suatu yang berdiri di belakangnya. (perkara ini akan dipecahkan di akhir rencana ini kelak. P).


Selain daripada kekuatan yang “memerintahkan” India supaya menyerang Pakistan, maka India berasa bangga di atas kekuatannya seperti di bawah ini: India mempunyai tentera sebanyak

900,000 berbanding dengan Pakistan yang hanya mempunyai tentera sebanyak 150,000.

India mempunyai kapal terbang sebanyak 1,500 buah, sedang Pakistan hanya mempunyai 300 buah.

India mempunyai kereta kebal (tank) sebanyak 1,500 buah, Pakistan hanya memiliki 300 buah sahaja.

India mempunyai sebuah induk kapal terbang dan angkatan laut yang kuat, Pakistan tidak mempunyai induk kapal terbang itu. Tetapi sebaliknya Pakistan ada mempunyai sebuah kapal selam, sedang India tidak ada, kerana tatkala Amerika hendak memberi kepada India sebuah kapal selam juga, ia cerewet



Ketua tentera Pakistan sedang memeriksa tempat-tempat kawalan di sempadan sebelum berlaku serangan-serangan India ke Pakistan.

hendakkan empat buah, tetapi Amerika tidak dapat memenuhi kehendak India itu, dari kerana itu ia terus meminta kepada Rusia yang telah berjanji bakal mengirimkannya di dalam tahun 1966 ini – ertiinya sesudah berlakunya perperangan India dengan Pakistan.

Kedudukan Serangan:

Tentera-tentera Pakistan hamper-hampir keseluruhannya – pada masa itu – ditumpukan dekat sempadan Kashmir. India menyiapkan pasukannya yang kuat di sempadan India Pakistan berhampiran dengan bandar Lahore yang jauhnya hanya 17 batu sahaja. India mengadakan dua ketumbukkan pasukan kereta kebalnya – satu pasukan di tengah-tengah menuju ke Lahore dan satu pasukan lagi di sebelah selatannya – dengan suatu tujuan kedua-dua pasukan itu hendaklah bertemu dan minum teh di kota Lahore pada pukul 10 pagi itu. Ditengah-tengah perjalanan

di antara India dan Lahore ada sebuah sungai dan di sana ada sebuah jambatan.

Di sempadan ini ada berkawal 300 orang tentera Pakistan. Apabila serangan-serangan dilakukan oleh tentera-tentera India, maka tidak ada lain jalan bagi tentera-tentera Pakistan yang sebanyak 300 orang itu selain daripada nekad mempertahankan serangan-serangan kereta kebal-kereta kebal India yang banyak itu. Mereka terus menembak kereta kebal-kereta kebal India dengan hebat dan beraninya, sehingga pasukan India menyangka bahawa di sana ada kubu pertahanan Pakistan yang lebih kuat dan menyebabkan mereka tidak berani mara menempuh pasukan Pakistan yang hanya sedikit itu – jika serangan ini dilakukannya tentunya kemaraan tentera-tentera India itu tidak akan dapat ditahan-tahan – dalam pada itu apabila tentera-tentera Pakistan mengetahui akan kemunduran tentera-tentera India itu, maka sebuah kapal terbang Pakistan

dengan tiba-tiba datang menyerang tempat pertahanan tentera-tentera India itu dan menghancurkan jambatan yang berada di tempat itu, sedang pasukan tentera jalan kaki Pakistan yang sebanyak 300 orang berjuang terus dengan tidak mahu menyerah diri sehingga pada akhirnya mereka kesemuanya gugur syahid dimedan pertempuran. Semangat keberanian yang disadur dengan rasa keimanan yang teguh inilah yang selalu menakutkan tentera-tentera India yang kuat dan banyak bilangannya itu.

Dalam menghadapi angkatan tentera India yang berada di sebelah selatan menuju ke bandar Lahore, sebanyak 100 orang tentera Pakistan yang telah berjuang dengan secara nekad. Bom-bom diikatkan pada belakang mereka, dan dari atas bukit-bukit mereka satu persatu menerjunkan dirinya dengan tujuan untuk menghancurkan kereta kebal-kereta kebal India dan untuk menyekat kemaraannya. Dengan keberanian 100 orang tentera Pakistan yang luar biasa itu, maka kemaraan tentera India dapat dipertahankan dan sementara itu sekalian tentera-tentera yang berada di Kashmir sempat dipindahkan ke barisan hadapan untuk menyekat tentera-tentera India.

Angkatan tentera India lebih dahulu telah mengisyiharkan bahawa bandar Lahore telah jatuh ke tangan India. Dengan kekuatan yang ada tentunya dapat dipastikan bahawa kota Lahore yang hanya sejauh 17 batu dari sempadan itu pasti akan dapat ditawan oleh tentera-tentera India tidak lewat pada pagi itu juga. Jatuhnya kota Lahore bererti terputusnya perhubungan di antara Rawalpindi dengan Karachi – keadaan

ini adalah menentukan hidup matinya Pakistan. Dengan kekuatan yang ada akhirnya dalam masa sepuluh hari tentera-tentera Pakistan telah dapat mara memasuki tanah besar India – menyerang balas – dengan semangat kepahlawanan tentera-tentera Pakistan yang sedikit bilangannya itu, maka kota Lahore yang penting itu dapat dipertahankan!

Kegagalan Serangan Diatas Karachi:

Umumnya orang-orang Karachi tidak mengetahui yang mereka telah diserang – oleh itu didapati sesetengah-sesetengah tempat dalam kota Karachi “black out” dan setengah tempat yang lain terang benderang seperti biasa. Sebanyak 50 buah kapal terbang angkatan udara India terbang menuju ke Teluk Parsi dengan tujuan sepulangnya dari sana nanti akan menggugurkan bom-bom ke atas bandar Karachi. Pakistan telah mengisyiharkan bahawa seluruh bandar

Karachi adalah kawasan yang mesti digelapkan (*black out*); tetapi sebalinya Pakistan tidak berbuat demikian itu, seluruh bandar Karachi diterangkan seperti biasa. Tatkala kapal terbang-kapal terbang India itu pulang melalui kota Karachi mereka dapati kota itu terang benderang dengan cahaya lampu-lampu yang gemerlap. Pemandu-pemandu kapal terbang itu tidak menyangka bahawa kota yang terang benderang yang berada di bawah mereka itu ialah kota Karachi – kerana sepanjang yang mereka ketahui kota Karachi telah diisyiharkan sebagai sebuah kota yang mesti digelapkan – oleh itu mereka pun terus terbang pulang dengan tidak menggugurkan walau sebutir bom jua pun ke atas kota Karachi itu; sekali pun ada berita dari Delhi yang mengatakan bahawa kota Karachi telah dibom dengan hebatnya.



Runtuhan-runtuhan daripada bom-bom India di tanah Pakistan tatkala hendak menuju mara ke Lahore.



Kesan-kesan dari bekas-bekas serangan bom India di sempadan Pakistan

Rupanya tipu helah yang dijalankan oleh Pakistan itu pada akhirnya diketahui oleh pihak India: yang mana menyebabkan pada malam esoknya sepasukan kapal terbang India telah datang semula di angkasa bandar Karachi untuk menyerangnya. Tetapi pada ketika itu juga sepuluh buah kapal terbang Pakistan yang dipandu oleh pilot-pilotnya yang bersemangat waja dengan segera naik ke udara untuk menyambut serangan-serangan dari kapal terbang-kapal terbang India itu.

Di sekeliling bandar Karachi telah siap sedia diletakkan meriam-meriam penangkis kapal terbang. Dengan secara kebetulan sebuah antara kapal terbang Pakistan yang sepuluh itu tatkala hendak naik ke udara terus jatuh terhempas ke bumi. Kejadian itu tidak disedari oleh pemerintah (komando) angkatan udara yang telah naik terbang ke udara itu. Apabila ia menoleh ke belakang dilihatnya api menjilat-jilat menyala dengan hebatnya, disangkanya musuh telah berjaya memasuki kota Karachi, maka dengan tidak berlengah lagi ia pun terus memberi perintah untuk keluar dari udara Karachi dan memberi isyarat kepada pasukan meriamnya yang

berada di bawah supaya menembak kapal terbang-kapal terbang India itu. Dengan tembakan yang luar biasa dari meriam-meriam penangkis pasukan Pakistan itu itu maka komando angkatan udara India pun memerintahkan kesemua kapal terbang pulang ke Delhi, kerana ia berpendapat tidak ada faedahnya menghadapi tembakan-tembakan yang sebegitu hebat dari bawah. Ini ialah sebahagian daripada gambaran pertolongan Allah terhadap Negara Islam Pakistan yang sedang berjuang melawan pencerobohan yang dilakukan oleh negara jirannya yang bukan Islam India. selain daripada ini banyak lagi kejadian-kejadian lain yang berlaku.

Berhubung dengan pasukan laut India yang lebih besar dan lebih gagah daripada anggota laut Pakistan itu hanya terbengkalai begitu sahaja tidak dapat digunakan untuk menyerang. Sebabnya ialah secara kebetulan pada masa itu ada dua buah kapal selam Turki ada dipinjamkan kepada Pakistan, dan pada tatkala itu juga tatkala Indonesia mengetahui bahawa Pakistan diserang oleh India; Sukarno terus memanggil duta Pakistan di Jakarta dan beliau menyatakan bahawa Indonesia adalah

berdiri teguh dibelakang Pakistan dan beliau berjanji akan mengantarkan 75% daripada kekuatan tenteranya untuk bersama-sama menentang pencerobohan India itu. Hal perundingan ini diketahui oleh India. India juga tahu bahawa Indonesia ada mempunyai 30 buah kapal selam yang diberi oleh negara-negara Blok Komunis – Cina dan Rusia – jika India menggerakkan angkatan lautnya pada ketika itu mungkin akan menjadi kurban, dan kurban bagi sebuah kapal perang adalah besar kerugiannya. Dengan ini tidaklah kita mendengar adanya gerakkan tentera laut India di dalam serangan-serangannya ke atas Pakistan.

(Segala kejadian-kejadian yang aneh ini sepatutnya menjadi suatu peringatan kepada kerajaan Pakistan dan umat Pakistan supaya mereka berpegang teguh kepada dasar-dasar Islam dan dengan lebih gigih lagi memperjuangkan suruhan-suruhan agama).

Siapakah yang menjadi petualang di dalam semua kejadian ini? bacalah rencana **“Bagaimana Penjajahan Baru Menguasai Dunia Seluruhnya.”** yang ada kita siarkan di muka yang lain.